

# 200 nelayan Sungai Rengit tidak dapat turun ke laut



Seorang nelayan menunjukkan kesan minyak di pesisir pantai di Sungai Rengit, Pengerang, Johor, semalam.

(Foto Nur Aisyah Mazalan/BH)

## Tunggu kesan tumpahan minyak pulih elak tanggung rugi lebih tinggi

Oleh Omar Ahmad  
bhnews@bh.com.my

**Kota Tinggi:** Hampir 200 nelayan yang berpangkalan di Sungai Rengit, Pengerang di sini, terpaksa menanggung kerugian apabila tidak dapat turun ke laut sejak lima hari lalu akibat kesan tumpahan minyak yang mengotori jaring serta kelengkapan mereka.

Pengerusi Pertubuhan Kebajikan Nelayan Pangkalan Sungai Rengit, Rosli Mohd Ali, 56, berkata sejumlah 183 nelayan yang menjadi ahli persatuan itu terpaksa menunggu sehingga kesan tumpahan minyak di sekitar pesisir pantai Sungai Rengit pulih bagi mengelak mengalami lebih banyak kerugian.

Katanya, kejadian disadari ko-

muniti nelayan Isnin lalu, sewaktu mencari hasil laut di perairan Sungai Rengit.

“Kita sedar apabila nampak tompokan hitam terapung di laut, terus kita tarik jaring dan pulang ke jeti. Sampai sahaja di jeti, baru kita nampak kesan banyak tompokan minyak di tepi pantai.

“Keesokannya, nelayan tidak boleh turun ke laut untuk menangkap ikan, kesan minyak ini jika terkena pada peralatan nelayan seperti jaring, pelampung dan tali, memang tidak dapat dibersihkan lagi, kena buang terus.

“Jaring nelayan ini ada simpulan yang kita panggil buku untuk mata jaring, kena minyak memang tidak hilang. Apabila kita pakai juga jaring yang tercemar dan rosak, hasil tiada sebab berbau,” katanya ketika ditemui di jeti Pangkalan Nelayan Sungai Rengit, semalam.

Rosli berkata, kejadian tumpahan minyak pernah terjadi 10 tahun lalu, di mana kesannya sangat teruk kepada komuniti nelayan.

Katanya, ketika itu lebih 30 bot nelayan terkena minyak sehingga ke dek apabila arus kuat dan berombak membawa air yang tercemar minyak ke kawasan muara sungai, yang menempatkan bot mereka.

“Tompokan minyak ini hanyut mengikut arus, apabila pasang akan masuk ke muara sungai dan surut pula akan tersangkut.

“Apabila panas di kawasan pantai akan nampak berketul-ketul minyak, kalau ikutkan pelanggaran kapal itu berlaku di Singapura, tetapi boleh sampai ke sini.

“Dalam situasi ini, kalau kita turun juga ke laut kerugian itu akan berlipat kali ganda. Peralatan nelayan bukan murah, jaring putih yang siap sehelai harganya mencecah RM360. Biasa nelayan laut dalam macam kami ini akan pakai 60



Rosli Mohd Ali

helai. Jadi, boleh kira ruginya kami kalau semua peralatan itu rosak terkena minyak.

“Kita tahu seandainya buat laporan pihak berkaitan akan ganti, tetapi ia mengambil masa hampir sebulan untuk siapkan jaring, kena tunggu lagi lama.

“Lebih baik kami tunggu pihak berkuasa membersihkan pantai dan laut daripada rugi berganda,” katanya yang sudah 30 tahun menjadi nelayan laut dalam dan nelayan pantai.

### Air laut berbau minyak

Sementara itu, tinjauan mendapati air laut di pesisir Pantai Sungai Rengit di sini, berubah menjadi warna kehitaman dan berbau minyak.

Keadaan itu dapat dilihat sepanjang kira-kira satu kilometer garis pantai di Sungai Rengit ke Teluk Ramunia, akibat kesan tumpahan minyak berikutan insiden pelanggaran kapal di kawasan perairan Singapura.

Biarpun sudah memasuki hari kelima, kesan berkenaan masih lagi dapat dilihat, terutama ke-

tika air surut.

Tinjauan di lokasi ketika air laut pasang pagi semalam, mendapati sebahagian air laut di pesisir pantai berwarna hitam.

Bagaimanapun, keadaan itu tidak membabitkan sepanjang pesisir pantai yang panjang dan hanya bersifat berkelompok, khususnya di kawasan berteluk seperti pantai berdekatan Pangkalan Nelayan Sungai Rengit, Dataran Sungai Rengit dan Pantai Teluk Ramunia di sini.

Sisa kesan tompokan minyak juga dapat dilihat pada sampah yang berada di pesisir pantai terjejas seperti batu, pasir dan tiang jeti serta bahagian tepi bot nelayan.

Seawal jam 10 pagi semalam, kerja pembersihan dijalankan kontraktor pembersihan dipercayai dilantik pihak berkuasa Singapura yang mempunyai kepakaran dalam pembersihan tumpahan minyak di kawasan pesisir pantai.

Turut kelihatan beberapa pegawai Jabatan Alam Sekitar (JAS) Johor membuat pemantauan di sekitar lokasi terbabit.



Tumpahan minyak di pantai Sungai Rengit dan Teluk Ramunia beri kesan kepada komuniti nelayan. (Foto BERNAMA)



Kesan minyak pada pelampung nelayan akibat tumpahan.